



HÁSKÓLI ÍSLANDS
FÉLAGSFRÆÐI-, MANNFRÆÐI-
OG ÞJÓÐFRÆÐIDEILD

Hvað gera félagsfræðingar?

hi.is/felagsfraedi

Félagsfræðingar starfa við opinbera stjórnsýslu, félagsþjónustu, fjölmiðla, tómstunda-, menningar- og íþróttastarfsemi, fræðslu, fjármála- og tryggingastarfsemi, rannsóknir og ráðgjöf. Þeir vinna jafnt hjá hinu opinbera og á einkamarkaði og kannanir sýna að langflestir telja nám sitt í félagsfræði nýttast vel í starfi.



Daníel Arnarsson, framkvæmdastjóri Samtakana78 og félagsfræðingur

Helsti kosturinn við félagsfræðina er að hún gerir manni kleift að hugsa hlutina á annan hátt en maður hélt mögulega í upphafi að væru sannir eða réttir. Hún kennir það sem öll menntun á að kenna: Gagnrýna hugsun, að taka engu sem gefnu og að það er alltaf hægt að læra meira. Félagsfræðin hefur einnig kennt mér að gagnrýna aðra á uppbyggilegan hátt, rýna og lesa betur í aðstæður og einnig hefur hún auðveldað mér að setja mig í spor annarra. Það sem hefur nýst mér vel er getan til að skilja fólk út frá bakgrunni þess og reynslu, ég get áttað mig á ójöfnuði í samfélaginu og óréttlæti. Í praktík þá hefur félagsfræðin einnig kennt mér að rýna í tölur, vita hvað er marktækt og hvað ekki. Einnig hefur hún kennt mér að lesa úr gögnum, skýrslum og fræðigreinum, það hefur nýst mér gríðarvel.



Albertína Friðbjörg Elíasdóttir, þingkona og félagsfræðingur

Félagsfræðin veitti mér ótrúlega sterkan og fjölbreyttan grunn í öllum mínum störfum. Ég hef í fyrri störfum mínum til að mynda þurft að vinna allskyns greiningar og skýrslur og þar hefur reynslan úr félagsfræðinni verið virkilega gagnleg. Á mínum starfsferli hef ég verið í allskyns störfum, sum raungreinatengdari en önnur og hefur námið reynst vel í þeim öllum. Í núverandi starfi hefur svo bersýnilega komið í ljós hversu gagnlegt námið er þar sem skilningur á samfélaginu og ólíkum þáttum þess skiptir öllu máli. Ég get eindregið mælt með námi í félagsfræði. Þetta er fjölbreytt og skemmtilegt nám sem er virkilega gott að byggja á til framtíðar.



Ólafur Halldór Ólafsson, félagsfræðingur, tónlistarbókari, plötusnúður og útvarpsmaður

Það er ekki til betri grunnur en félagsfræði og í öllu því sem ég hef tekið mér fyrir hendur að námi loknu hefur félagsfræðin veitt mér ómetanlegt innsæi í að lesa aðstæður sem hafa komið upp í þeim störfum. Ég hef unnið sem plötusnúður í yfir 10 ár og það sem félagsfræðin hefur gert mér kleift í því starfi er að kunna að greina hópa og það hefur hjálpað mér að lesa "kráðið" sem er eitt það mikilvægasta í starfi plötusnúðs. Sömu leiðis hefur félagsfræði hjálpað mér mikið í starfi rekstrarstjóra í Bío Paradís þar sem samskipti eru mikilvæg. Eins var félagsfræðin gott veganesti í framhaldsnáminu sem ég stundaði við Háskóla Íslands.

Lokaritgerðin mín fyrir MA í Blaða og fréttamennsku fjallaði um Elvis Presley og áhrif hans á samtímann, sér í lagi með sjónvarp að leiðarljósi. Ég fór til Tennessee til að vinna hana og þar kom félagsfræði að góðu gagni bæði í úrvinnslu gagna og annarri greiningu.



Huguína Harpa Reynisdóttir, félagsfræðingur og forstöðumaður Nýheima Þekkingarseturs

Í námi mínu í félagsfræðinni hlaut ég dýrmæta þekkingu og grunn sem ég hef búið að síðan. Í félagsfræðinni tileinkaði ég mér vönduð og fagleg vinnubrögð, enda rík áhersla lögð á vinnulag og aðferðafræði. Þessi þekking undirbjó mig sérstaklega vel fyrir framhaldsnámið og einnig fyrir þau verkefni sem ég vinn í starfi mínu í dag. Félagsfræðin er fjölbreytt og skemmtilegt nám sem nýtist manni á svo margan hátt. Aukinn skilningur á samfélaginu, ólíkum hefðum og gildum nýtist manni í allri samfélagslegri þátttöku. Ekki síst í starfi sem mínu þar sem samstarfsfólk kemur úr ólíkum áttum. Félagsfræðin eykur skilning manns á því hvernig ólíkar aðstæður geta haft mótandi áhrif á fólk og í mínum huga gerir það mann hæfari til samstarfs. Félagsfræðin kennir manni að spyrja spurninga og líta undir yfirborðið í leit að skýringum sem blasa ekki alltaf við, það finnst mér einn mesti kostur félagsfræðinnar. Það var góð ákvörðun að fara í BA nám í félagsfræði.

Skrifstofa Félagsfræði-, mannfræði- og þjóðfræðideildar
Gimli

við Sæmundargötu
101 Reykjavík
Sími 525 4500
nemFVS@hi.is
hi.is/felagsfraedi



HÁSKÓLI ÍSLANDS
FÉLAGSFRÆÐI-, MANNFRÆÐI-
OG ÞJÓÐFRÆÐIDEILD